

Diñanars 3 di December, 2000 **2001**

# Stichting Monumento Juancho Irausquin ta conmemora e dia natal di e gran sirbidor di pueblo



**ORANJESTAD** - Stichting Monumento Juancho Irausquin ta conmemora ariba e dia natal di Juancho Enrique Irausquin, esta 3 december, e gran sirbidor di pueblo aki. Na e ocasion aki e stichting ta kere cu ta importante pa trese dilanti tur e logronan di Juancho

Irausquin cu a trese cu ne cu Aruba a drenta den un era completamente nobo y cu te cu awe nos ta cosecha e frutonan di su vision y deseonan.

Juancho Irausquin tabata un persona cu tabata tin e vision pa traha projectonan y tin ideanan pa termino largo.

Su plannan tabata amplio y ariba tur tereno. Dor di planifica Juancho Irausquin por a logra pa desaroya Aruba grandemente pero na mesun momento a pone e fundeshi pa leynan pa proteha e personanan di menos of ningun recurso ( ley di pensioen, vuido y Huerfano), y pa duna oportunidad na tur persona pa desaroya nan mes pa nan tin posibilidad den bida pa progreso (ley school liber, beca) y alaves proteha e trahador (Ley di CAO).

Juancho Irausquin tabata tin un tien jaren plan locual e la laga atras y te awe esakinan ta ser ehecuta. Juancho Irausquin tabata e fundador di locual nos tin awe cu nos ta tuma "forgranted." Stichting Monumento Juancho Irausquin pa medio di esaki ta recorda un par di e logronan di Juancho Irausquin cu nos no mag di lubida.

## TURISMO

Juancho Irausquin tabata tin e vision pa desaroya y salbanguardia Aruba. Juancho tabata desea un otro entrada pa Aruba pa Aruba no depende di Lago cu tabata e pilar di entrada principal pa Aruba. Juancho tabata kier un segundo pilar di entrada por si acaso Lago lo sera un dia. Hopi hende a bisa cu esey nunca lo pasa. Cu e entrada di turismo planea dor di Juancho Irausquin un era nobo pa Aruba a cuminsa. E fundeshi economico di nos pais a wordo poni. Ta Juancho Irausquin a pone number di Aruba ariba mapa Internacional y a habri caminda pa miles y miles di Arubiano por labora den sector di Turismo. Juancho Irausquin ta e fundador di Turismo, e persona cu tabata tin e vision cu Aruba lo bira un Miami chikito. Ta e vision di Juancho Irausquin a pone Aruba drenta den un era nobo cu a trese desaroyo y prosperidad pa Aruba. Su plan pa garantisa entrada pa Aruba a traha na momento cu Lago di berdad a sera y asina a salbanguardia Aruba hasta despues cu e no tabata tei mas. Awor Turismo ta nos pilar di entrada mas grandi di Aruba. Aruba ta awe loke e ta danki na Juancho Irausquin. Un Arubiano cu a cambia Aruba pone den un era nobo.

## SIGURIDAD DI UN BIDA MINIMAL

E pensioen cu nos tin awe cu nos ta tuma manera ta algo normal ta algo cu Juancho Irausquin a laga atras pa nos. Juancho Irausquin tabata kier pa e progreso cu e a trese pa Aruba lo ta pa un y tur. E no a lubida ariba e grandinan y a zorg pa tin un ley pa sigura e entrada pa e grandinan. No por nada e tabata wordo jama Sirbidor di Pueblo. E la traha pa sigura un entrada pa personanan cu menos of ningun recurso y cu ta den dificultad manera e grandinan, vuida y Huerfano. E no a lubida ariba nan ora Aruba tabata den progreso.

## EDUCACION

Juancho Irausquin tabata kier pa tur hende por tin e mesun oportunidad pa por desaroya su mes. Educacion ta e manera pa un persona desaroya su mes pa e por bai dilanti. Pa e tin oportunidad den bida. Pa logra esey Juancho Irausquin a bin cu scol gratis y cu studiebeurs (beca). Asina Juancho a percura cu tur mucha lo hanja un educacion pa nan por tin oportunidad den bida. Ainda tin hopi mas logro di Juancho Irausquin. Fundacion Juancho Irausquin ta hanja cu ta sumamente importante pa e pueblo no lubida un persona asina grandi pero cu curazon humilde cu a traha duro pa nos pueblo. Nos no tin cu lubida e heroenan cu nos pais tin. Juancho Irausquin sigut ta uno heroe hopi grandi di Aruba. Pabien Aruba!